

岑
嘉
州
詩

岑嘉州詩

四部叢刊集部

新刊岑嘉州詩序

岑詩故有鏤本歲漸漫滅方伯沈君仁甫學憲
主君子衡謂參嘗仕于蜀以其集重授梓人匪
直傳其詩兼重其人也參當天寶與杜子美並
世子美數與倡酬比之謝朓猶爲詩言也又公
薦之肅宗稱其識度清遠議論雅正時輩所仰
可備獻替之官是其卓爾大雅絕類流輩者豈
惟詩哉子美自許甚高其立朝他無所見獨薦
此一人耳不知其人視其與子美所推轂其人
可知矣方諸餘子豈維等伍哉唐史且傳王維

而參也顧遺異哉其所取乎予故著之補史氏
之遺俾觀者得論其世且終二君子雅意云
正德庚辰三月壬子新都楊慎序

岑嘉州詩卷之一

五言古詩

送許子擢第歸江寧拜親因寄王大昌齡

建業控京口金陵款滄溟君家臨秦淮旁對石頭城
十年自勤學一鼓遊上京青春登甲科動地聞香名
解榻皆五侯結交盡群英六月槐花飛忽思葦菜羹
跨馬出國門丹陽返柴荆楚雲引歸帆淮水浮客程
到家拜親時入門有光榮鄉人盡來賀置酒相邀迎
閑眺北固樓一作登江樓醉眠湖上亭月從海門出
照見茅山青昔爲帝王州今幸天地平一作天五朝作
胡變人世千載空江聲玄元告靈符丹洞獲其銘皇

帝受玉冊群臣羅天庭喜氣薄太陽祥光徹宵冥奔
走朝蕙國崩騰集百靈王兄尚謫宦屢見秋雲生孤
城帶後湖心與湖水清一縣無諍辭有時開道經黃
鶴垂兩翅徘徊但悲鳴一作悲相思不可見空望牛
女星

武威送劉單判官赴安西行營便呈高開府
熱海亘鐵門火山赫金方白草磨天涯胡沙奔茫茫
夫子佐戎幕其鋒利如霜中歲學兵符不能守文章
功業須及時立身有行藏男兒感忠義萬里忘越鄉
孟夏邊候遲胡國草木長馬疾過飛鳥天窮超夕陽
都護新出師五月發軍裝甲兵二百萬錯落黃金光

揚旗偁一作拂崑崙伐鼓振蒲昌太白引官軍天威臨
大荒西望雲似蛇戎夷知喪亡渾驅大宛馬繫取樓
蘭王曾到交河城風土斷人腸塞驛遠如點邊烽互
相望赤亭多飄風鼓怒不可當有時無人行沙石亂
飄揚夜靜天蕭條鬼哭夾道旁地上多髑髏皆是古
戰場置酒高館夕邊城月蒼蒼軍中宰肥牛堂上羅
羽觴紅淚金燭盤嬌歌艷新妝望君仰青冥短翮難
可翔蒼然西郊道握手何慨慷

送王大昌齡赴江寧

對酒寂不語悵然悲送君明時未得用白首徒攻文
澤國從一官滄波幾千里群公滿天闕獨去過淮水

舊家富春渚，嘗憶臥江樓。自聞君欲行，頻望南徐州。
窮巷獨閉門，寒燈靜深屋。北風吹微雪，抱被肯同宿。
君行到京口，正是桃花時。舟中饒孤興，湖上多新詩。
潛虬且深蟠，黃鶴一作黃鸝飛來晚。惜君青雲器，努力加餐飯。

送祈樂歸河東

祈樂後來秀，挺身出河東。往年詣驪山，獻賦溫泉宮。
天子不召見，揮鞭遂從戎。前月還長安，囊中金已空。
有時忽乘興，盡出汪上峯。牀頭蒼梧雲，簾下天台松。
忽如高堂上，颯颯生清風。五月火雲屯，氣燒天地紅。
鳥且不敢飛，子行如轉蓬。少華與首陽，隔河勢爭雄。

新月河上出清光滿關中置酒灞亭別高歌披心胷君

到故山時爲吾謝老翁

一作爲謝
五老翁

北庭貽宗學士道別

萬事不可料歎君在軍中讀書破萬卷何事來從戎曾
逐李輕車西征出太蒙荷戈月窟外擐甲崑崙東兩度
皆破胡朝廷輕戰功十年祇一命萬里如飄蓬容鬢老
胡塵衣裘脆邊風忽來輪臺下相見披心胷飲酒對春
草彈碁聞夜鐘今且還龜茲臂上懸角弓平沙向旅館
匹馬隨飛鴻孤城倚大磧海氣迎邊空四月猶自寒天
山雪濛濛君有賢主將何謂泣途窮時來整六翮一舉
凌蒼穹

送許拾遺思歸江寧拜親

詔書下青瑣駟馬還吳洲東帛仍賜衣恩波漲滄流微
祿將及親向家非遠遊看君五斗米不謝萬戶侯適出
西掖垣如到南徐州歸心望海日鄉夢登江樓大江盤
金陵諸山橫石頭楓樹隱茅屋橘林繁漁舟種藥疏故
畦釣魚垂舊釣對月京口夕觀濤海門秋天子憐諫官
論事不可休早來丹墀下高駕無淹留

虢州郡齋南池幽興閣二侍御道別

時任虢州長史

池色淨天碧水涼雨淒淒快風從東南荷葉翻向西性
本愛魚鳥未能返巖溪中歲徇微官遂令心賞睽及茲
佐山郡不異尋幽棲小吏趨竹逕訟庭侵藥畦胡塵暗

河洛二陝震鼓輦故人佐戎軒逸翮凌雲霓行軍在山
谷雨度聞鶯啼相看紅旗下飲酒白日低聞君欲朝天
駟馬臨道嘶仰望浮與沉忽如雲與泥夜眠驛樓月曉
發關城雞惆悵西郊暮鄉書對君題

送青龍招提歸一上人遠遊吳楚別詩

久交應真侶最歎青龍僧兼官向二年削髮歸一乘了
然瑩心身潔念樂空寂名香泛窻戶幽磬清曉夕徃年
仗一劔由是佐二庭於焉久從戎兼復解論兵世人猶
未知天子願相見朝從青蓮宇暮入白虎殿宮女擎錫杖
御筵出香爐說法開藏經論邊窮陣圖忘機厭塵喧浪
迹向江海思師石可訪惠遠峯猶在今旦飛錫去何時

持鉢還湖煙冷吳門淮月銜楚山一身如浮雲萬里過
江水相思眇天外南望無窮已

送李翥遊江外

相識應十載見君只一官家貧祿尚薄霜降衣仍單惆
悵秋草死蕭條芳歲闌且尋滄洲路遙指吳雲端匹馬
關塞遠孤舟江海寬夜眠楚煙濕曉飯湖山寒砧淨紅
鱸落袖香朱橘團帆前見禹廟枕底聞嚴灘便獲賞心
趣豈歌行路難青門須醉別少爲解征鞍

送王著赴淮西幕府作

燕子與伯勞一西復一東天空信寥廓翔集何時同知
已悵難遇良朋非易逢憐君心相親與我家又通言笑

日無度書劄凡幾封湛湛萬頃波森森千丈松不知有
機巧無事干心宵滿堂皆酒徒豈復羨王公早年抱將
略累歲依幕中昨者從淮西歸來奏邊功乘恩長樂殿醉
出明光宮逆旅悲寒蟬客夢驚飛鴻發家見春草却去
聞秋風月色冷楚城淮光透霜空各自務功業當須激
深衷別後能相思何嗟山萬重

送張秘書充劉相公通汴河判官便赴江外觀
省

前年見君時見君正泥蟠去年見君處見君已風搏朝
趨赤墀前高視青雲端新登麒麟閣適脫解豸冠劉公
領舟楫汴水揚波瀾萬里江海通九州天地寬昨夜動

使星今旦送征鞍老親在吳郡令弟雙同官鱸膾刺堪
憶葦羹殊可餐既參幕中畫復展膝下驩因送故人行
試歌行路難何處路最難最難在長安長安多權貴珂
珮聲珊珊儒生直如弦權貴不須干斗酒取一醉孤愁
爲君彈臨岐欲有贈持以握中蘭

冬宵家會錢李郎司兵赴同州

急管雜青絲玉瓶屈金卮寒天高堂夜撲地飛雪時賀
君關西掾新綬腰下垂白面皇家郎逸翮青雲姿明旦
之官去他辰良會稀惜別冬夜短務歡慙行遲季女由
自小老夫未令歸且看疋馬行不得鳴鳳飛昔歲到馮
翊人煙接京師曾上月樓頭遙見西嶽祠沙苑逼官舍

蓮臺壓城池多暇或自公讀書復彈棋州縣信徒勞雲
霄亦可期應須力爲政聊慰此相思

送顏平原并序

十二年春有詔補尚書十數公爲郡守上親賦詩觴
群公宴于蓬萊前殿仍錫以繒帛寵餞加等參美公
是行爲寵別章句

天子念黎庶詔書換諸侯仙郎授剖符華省輟分憂置
酒會前殿賜錢若山丘天章降三光聖澤該九州吾兄
鎮河朔拜命宣皇猷駟馬辭國門一星東北流夏雲照
銀印暑雨隨行軸赤筆仍存篋鑪香惹衣裘此地鄰東
溟孤城帶滄洲海風掣金戟導吏呼鳴騶郊原北連燕

剽劫風未休魚鹽隘里巷桑柘盈田疇爲郡豈淹旬政
成應未秋易俗去猛虎化人似馴鷗蒼生已望君黃霸
寧久留

送狄員外巡按西山軍得霽字

兵馬守西山中國非得計不知何代策空使蜀人敝八
州崖谷深千里雲雪閉泉澆閣道滑水凍繩橋脆戰士
常苦饑糗糧不相繼胡兵猶不歸空山積年歲儒生識
損益言事皆審諦狄子幕府郎有謀必康濟胷中縣明
鏡照耀無巨細莫辭冒險艱可以裨節制相思江樓夕
愁見月澄霽

號州送鄭興宗第歸扶風別廬

佐郡已三載豈能長後時出關少親友賴汝常相隨今
且忍言別愴然俱淚垂半生滄洲意獨有青山知州縣
不敢說雲霄誰敢期因懷陳溪老最憶南峯緇我爲多
種藥還山應未遲

潼關鎮國軍句覆使院早春寄王同州

胡寇尚未盡大軍鎮關門旌旌遍草木兵馬如雲屯聖
朝正用武諸將皆承恩不見征戰功但聞歌吹喧儒生
有長策閉口不敢言昨從關東來思與故人論何爲廟
廊器至今居外藩黃霸寧淹留蒼生望騰鸞捲簾見西
岳仙掌明朝暎昨夜聞春風戴勝過後園各自限官守
何由叙涼溫離憂不可忘襟背思樹萱